

**ՀՈԼՈՎՄԱՆ ՈՒ ԽՈՆԱՐՀՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ
ՇԱՂԱԽԻ ԵՆԹԱՐԱՐԱՌՈՒՄ**

Բ. Խ. ՄԵԺՈՒՆՑ

Շաղախի խոսվածքախումբը պատկանում է այն բարբառների թվին, որոնց ձևաբանությունը բավական հեռացել է հին հայերենի օրինաչափություններից: Ստորև կանդրադառնանք նրա հոլովման ու խոնարհման համակարգում նկատվող առանձնահատկություններից մի քանիսին:

Շաղախի ենթաբարբառում գոյական անունների հոլովումը հաճախ որոշվում է բառի անորոշ կամ որոշյալ կիրառությամբ: Այսպես, բաղաձայնով վերջավորվող գոյականների մեծ մասն անորոշ առման դեպքում ենթարկվում է ու, իսկ որոշյալ առման դեպքում՝ է||ի հոլովման, ու ձայնավորով վերջավորվող գոյականներն անորոշ առման դեպքում հոլովվում են վու, իսկ որոշյալ առման դեպքում՝ վէ||վի հոլովմամբ: Սակայն ենթաբարբառում ունենք մի խումբ գոյականներ, որ ստանում են միայն մեկ հոլովիչ: Այս հանգամանքը հաշվի առնելով, Շաղախի ենթաբարբառի համար ընդունել ենք պարզ և խառը հոլովումներ: Պարզ հոլովման ենթարկվում են այն գոյականները, որոնք անորոշ և որոշյալ առումների դեպքում սեռականում ստանում են միայն մեկ հոլովիչ, ինչպես՝ ուղղ. աղջիկ-ախճիգյ, անորոշ և որոշյալ սեռ. ըխճրկան, ուղղ. աներ-հանէր, անորոշ և որոշյալ սեռ. հանուրու, ուղղ. շուն-շօն, անորոշ և որոշյալ սեռ. շան(ը) և այլն:

Խառը հոլովման են ենթարկվում այն գոյականները, որոնք անորոշ առման դեպքում ստանում են մեկ, իսկ որոշյալ առման դեպքում՝ մի այլ հոլովիչ: Այս երևույթը տարածվում է գոյականների ոչ միայն եղակի, այլև հոգնակի թվի վրա. օրինակ՝

Եզակի		Հոգնակի	
Անորոշ	Որոշյալ	Անորոշ	Որոշյալ
Ուղղ. քար	քարը	քարեր	քարերը
Սեռ. քարու	քարէն	քրրէրու	քրրէրէն
Տր. քարու	քարէն	քրրէրու	քրրէրէն
Հայց. քար	քարը	քարեր	քարերը
Բաց. քարա	քարան	քրրէրան	քրրէրան
Գործ. քարավ	քարավը	քրրէրավ	քրրէրավը
Ներգ. քարւմ	քարւմը	քրրէրւմ	քրրէրւմը

Հոլովման համակարգի ամբողջական պատկերը ցույց տալու համար ուսումնասիրել ենք Շաղախի ենթաբարբառի բառային կազմը և որոշել, թե ո՞ր բառերն են ենթարկվում պարզ և որո՞նք խառը հոլովման:

Պարզ հոլովման ենթարկվում են.

ա) ի, է ձայնավորներով վերջավորվող երկվանկ և բազմավանկ բառեր (բացի ագի-հաքի, կաշի-կաշի, լեզու-լիւզի երկվանկներից),

բ) ու հոլովման ենթարկվող աներ-հաներ, եղբայր-ախպեր, հորեղբայր-ղորպեր, տայգր-տաճիր գոյականները,

գ) նր-ով վերջավորվող բառերի մեծ մասը,

դ) արտաքին ա հոլովման ենթարկվող աղջիկ-ախճիգյ, կին-կրնէգյ բառերը և դրանցով կազմված բարդությունները, ինչպես նաև՝ ներքին ա հոլովման շուն-շօն, տուն-տօն գոյականները,

ե) օ (ո) հոլովման ենթարկվող հայր-հայր, մայր-մար, քուր-քուր բառերը,

զ) անեղական այն բառերը, որոնք ցույց են տալիս ազգակցություն, գերդաստան, տոհմ:

Խառը հոլովման են պատկանում՝

ա) բաղաձայնահանգ գոյականների մեծ մասը,

բ) ա ձայնավորով վերջավորվող գոյականները,

գ) նր-ով վերջավորվող մի խումբ բառեր,

դ) ի ձայնավորով վերջավորվող բոլոր միավանկ և ագի-հայի, կաշի-կաշի, լեղու-լյ՞ղի երկվանկ բառերը,

ե) տեղի հատուկ անունները,

զ) ժամանակ ցույց տվող բոլոր գոյականները,

է) ու, ու, օ ձայնավորներով վերջավորվող գոյականները:

Քննվող ենթաբարրառում ա ձայնավորով վերջավորվող բառերի եզակի ուղղական, հայցական և բացառական հոլովները ձևով նման են. դրանց տարբերակումը կատարվում է միայն ջեշտով. ուղղական և հայցական հոլովներում շեշտն ընկնում է բառի վերջնի վանկի ձայնավորի վրա, իսկ բացառականում՝ վերջին ձայնավորի վրա (օրինակ՝ ուղղ. դյո՛ւրբան ճըղվալ ա, հայց. մարը գյո՛ւրբան կըրկատալ ա, բաց. ուրան գյո՛ւրբան մին թիլ ա հանալ և այլն):

Ի, է ձայնավորներով վերջավորվող բառերը ենթարկվում են արտաքին ու հոլովման, սակայն որոշյալ առման դեպքում դրանք կարող են հոլովվել նաև ուղղականաձև՝ հոլովմամբ, այսինքն՝ հոլովման ժամանակ ուղղականի ձևը պահպանվում է նաև սեռական և տրական հոլովներում: Այս դեպքում ևս հոլովվալին իմաստների տարբերակումը կատարվում է շեշտի դիրքով. ուղղականում շեշտը դրվում է բառի վերջնի վանկի ձայնավորի, իսկ սեռական և տրական հոլովներում՝ վերջին վանկի ձայնավորի վրա (ուղղ. ծի՛լին սօր ա, սեռ. ծիլի՛ն իբըսը սըվացալ ա, ուղղ. կյի՛նին թուծվալ ա, սեռ. կյի-նի՛ն լիտըը էրկու մանաթ ա տէռալ և այլն):

Աներ-հաներ, եղբայր-ախպեր, հորեղբայր-ղորպեր, տայգր-տաճիր բառերը եզակի և հոգնակի թեք հոլովումներում կարող են ստանալ արտաքին ու հոլովիչ՝ միաժամանակ պահպանելով ներքին թեքման ու հոլովիչով ձևը, որի պատճառով էլ կունենանք կրկնակի հոլովիչով թեքման ձև, ինչպես՝ սեռ. տաճը՛րու || տաճը՛րցու, բաց. տաճը՛րու || տաճը՛րցու անա, գործ. տաճը՛րու. || || տաճը՛րցու անավ և այլն:

Ենթաբարրառի որոշ գոյականներին հատուկ է հոլովման բազմաձևություն, որը մեծ մասամբ հանդես է գալիս հոգնակի թեք հոլովներում, ինչ-

1 Այդպիսի հոլովումը պայմանականորեն անվանում ենք ուղղականաձև:

պես՝ ուղղ. ծուվէր «ձվեր», սեռ. ծուվէրու||ծուվէնուցը||ծուվէնուցու, ուղղ. քու-վէրքը «քույրերը», սեռ. քուվորցը||քուվորցու||քուվորաաց և այլն:

Շաղախի ենթաբարբառում համադրական բացառականը սովորաբար կազմվում է ա մասնիկով (որոշ դեպքերում նաև անա), իսկ վերլուծական բացառականը՝ անա մասնիկով. սակայն ժամանակ ցույց տվող գոյական-ների բացառականն առանձին դարձվածքներում ունենում է նաև աց||աց վեր-ջավորությունը (քշանաց-քշիշերավ «վաղ առավոտյան», ուրգունաց-րուղուն ա կյանս «ուշ-ուշ է դալիս», օրկանց-օր ըմ տըսնաս «ուշ-ուշ եմ տեսնում» և այլն):

Եզակի և հոգնակի թեք հոլովներում ու, ա ձայնավորները նախորդող և հաջորդող հնչյունների կարող են ամբողջապես իրենց նմանեցնել՝ ստեղծելով ներդաշնակութուն (ուղղ. արմուկն-արմունգ, հոգնակի բաց. ուրմունգնան, ուղղ. բազումք-պէգունկ, եզ. սեռ.-տը. պաւղունկէն, ուղղ. ըշունքնէ «աշուններ», հոգ. սեռ.-տը. ուշունքնու):

Ենթաբարբառի առանձնահատկությունները որոշ չափով դրսևորվում են նաև դերանունների հոլովման համակարգում: Այսպես, ի տարբերություն ժամանակակից հայերենի, Շաղախի ենթաբարբառի անվանական հոլովում ունեցող դերանունները ենթարկվում են թե՛ պարզ, և թե՛ խառը հոլովումների: Պարզ հոլովման են ենթարկվում ստացական դերանունները, իսկ խառը հոլովման՝ հարցա-հարաբերական, որոշյալ, անորոշ, փոխադարձ և ժըխտական դերանունները:

Ենթաբարբառում դերանվանական հոլովման պատկերը արտահայտվում է սեռական և տրական հոլովներում բառի արմատի փոփոխմամբ, սակայն որոշ դերանուններ շեղվում են այդ օրինաչափությունից: Այսպես, օրինակ՝ երրորդ դեմքի ինքը անձնական դերանունը չի պահպանել սեռականի ձևը և նրա փոխարեն գործածվում է տրականի ձևը.

Ուղղ. ինքը	Բաց. ուրան անա
Սեռ. ուրան	Գործ. ուրան անավ
Տը. ուրան	Ներգ. ուրան անըմ

Հարցա-հարաբերական ճու «ով» դերանունը, ընդհակառակը, տրական հոլովի համար առանձին ձև չունի, նրա փոխարեն գործածվում է սեռականի հոլով ձևը. այս դեպքում, բնականաբար, բացառական, գործիական և ներգոյական հոլովները կազմվում են սեռականով, օրինակ՝

Ուղղ. հու	Բաց. հուր անա
Սեռ. հուր	Գործ. հուր անավ
Տը. հուր	Ներգ. հուր անըմ

Շաղախի ենթաբարբառում բայական առանձնահատկությունները դրսև-վորվում են թե՛ դերբայների կազմության ու նրանց կիրառության և թե՛ դի-մավոր ձևերի կրած փոփոխությունների մեջ: Այսպես, ի տարբերություն ժա-մանակակից հայերենի, Շաղախի ենթաբարբառում անորոշ դերբայն ունի անվանական և բայական գործածություն: Անվանաբար գործածվելիս անորոշ դերբայը հոգ է ստանում և հոլովվում ու-է||ի խառը հոլովմամբ (անորոշ առ-ման դեպքում ու, իսկ որոշյալ առման դեպքում է||ի հոլովմամբ): Անորոշ դերբայի տարբեր ձևերը նախադասության մեջ ընդհանրապես կիրառական

նույն նշանակությունն ունեն, այսինքն՝ կատարում են որոշչի պաշտոն: Սակայն անորոշի (ու հոլովման) սեռականն իմաստային ինչ-ինչ տարբերություն է ցուցաբերում. այսպես՝ ուտիլու հաց, կլիրիլու նամակ ոչ միայն նշանակում է «ուտելու հաց», «գրելու նամակ», այլև՝ «դեռ չկերած հաց», «դեռ չգրված նամակ»:

Բայական գործածությունը անորոշ դերբայը մասնակցում է պայմանական, հարկադրական եղանակների անցյալ ապառնի ժամանակների, պայմանական եղանակի ժխտական ձևերի և արգելական հրամայականի կազմությանը: Այսպես, օրինակ՝ պատմիլ ըմ լյալ² «կպատմեի», բիդի պատմիլ ըմ լյալ «սլիտի պատմեի», ասիլ չըմ լյալ «չէի ասի», ասիլ մէ, ասիլ մէք ճմի ասա, մի ասէք»: Շաղախի ենթաբարբառի համար որպես ապառնի դերբայ կարելի է ընդունել էլի հոլովման անորոշ դերբայի սեռականը (ընդհանրապես բարբառիս ապառնի դերբայը կազմվում է ակաճ||ալան մասնիկով): Ի տարբերություն ակաճ||ալան կազմությանը ապառնի՝ այդ դերբայը սովորաբար ունի անվանական կիրառություն: Որոշ դեպքերում անորոշի ի վերջավորություն սեռականը ընիլ «լինել» բային կցելով՝ կարող է կազմել երկրորդական բաղադրյալ ժամանակներ (վէր պիրիլի բնիս «որ բերելու լինես», վէր պիրիլի ընիս լյալ «որ բերելու լինեիր»): Հաճախ այդպիսի ձևերում ապառնի դերբային փոխարինում է անկատարը, որ և ավելի սովորական է ու տարածված, ինչպես՝ վէր տընիս ընիս «որ տանելու լինես», վէր տընիս ընիս լյալ «որ տանելու լինեիր» և այլն:

Որպես ընթացակցական դերբայ ենթաբարբառում գործածվում է անորոշի գործիական հոլովը. օրինակ՝ կլիրիլ-կլիրիլալ, հըսնիլ-հըսնիլալ և այլն: Դերբայական այս ձևը սովորաբար արտահայտում է գլխավոր գործողությունը նախորդող մի այլ գործողություն, սակայն որոշ բայերի ընթացակցական դերբայը կարող է արտահայտել նաև ընթացքի մեջ գտնվող, դեռ չավարտված գործողություն. այս դեպքում ընթացակցական դերբայը բաղադրում է ժամանակային ձևեր, ինչպես՝ քուշտունալալ ըմ «կշտանալու վրա եմ», պրծընիլալ ա «վերջացնելու վրա է» և այլն:

Ենթաբարբառիս օժանդակ բայի անցյալ ձևերը չեն պահպանվել. դրանց իմաստն արտահայտվում է օժանդակ բայի ներկայի ձևերի և լյալ||իլալ բառի հարադրությամբ: Լյալ||իլալ ձևը լինել բայի վաղակատար-կատարյալ դերբայն է:

Անցյալ կատարյալի իմաստն արտահայտելու համար Շաղախի ենթաբարբառում պարզ կազմությանը առանձին ձև չկա. վաղակատար դերբայով և օժանդակ բայի ներկայով կազմված ձևերն արտահայտում են վաղակատար ներկայի և անցյալ կատարյալի իմաստ³ (պատմալ ըմ «պատմել եմ, պատմեցի», հվրտացալ ըմ «հավատացել եմ, հավատացի» և այլն):

Սահմանական եղանակի վաղակատար անցյալ ժամանակի համար ենթաբարբառն առանձին ձև չունի, նրա իմաստն արտահայտվում է հարակա-

² Այս ձևը գործածվում է նաև ըզձական եղանակի անցյալ ապառնի համար. այս դեպքում եղանակների իմաստային տարբերակումը կատարվում է միայն նախադասության մեջ:

³ Առանձին դեպքերում գործածվում են նաև անցյալ կատարյալի պարզ ձևերը. սովորաբար այդպիսի ձևերն արտահայտում են ոչ թե կատարյալի, այլ անմիջական ներկայի իմաստ, ինչպես՝ ասից ճհիմա ասում է», խօսից ճհիմա խոսում է» և այլն:

տար դերբայով և օժանդակ բայի անցյալ ձևերով. օրինակ՝ նրստած ըմ լյալ
«նստել էի, նստած էի», հվրտացած ըմ լյալ «հավատացել էի, հավատացած
էի» և այլն:

Պայմանական և հարկադրական եղանակների ապառնի ժամանակներն
ունեն պարզ կազմություն (կազմվում են ըղձական ապառնուց համապատաս-
խան կը, բիդի եղանակիչներով (կըհըսնիմ, բիդի հըսնիմ), մինչդեռ նույն
եղանակների անցյալ ապառնի ժամանակները կազմվում են անորոշ դերբա-
յով և օժանդակ բայի անցյալ ձևերով, ինչպես՝ հըսնիլ ըմ լյալ «կհասնեի»,
բիդի հըսնիլ ըմ լյալ «պիտի հասնեի»:

Բայերի կրավորականը սովորաբար կազմվում է ներգործական սեռի բա-
յերից վ ածանցի միջոցով, սակայն որոշ շեղոք բայեր ևս ընդունում են կրա-
վորական վ ածանցը՝ ունենալով անդեմ կամ հարցական գործածություն: Այս-
պես, օրինակ՝ նրանա մուտանվալ չի, նրանա մուտանվալ ա՞ ընիս. էս ծովըմը
լղանվալ չի, էս ծովըմըս լղանվալ ա՞ ընիս, վէր խուսիս ըք և այլն: Օտ բազ-
մապատկական ածանցով կազմված մի քանի բայեր կրկնվող գործողության
հետ միասին ցույց են տալիս նաև տվյալ գործողության ոչ ավարտուն վի-
ճակը, ինչպես՝ պըրվօտիլ (գործածվում է ծառերի, բույսերի համար) «լրիվ
չեն պառավել», սիպտիկօտիլ «լրիվ չեն սպիտակել», տըղնօտիլ «լրիվ չեն
դեղնել» և այլն:

Շաղախի ենթաբարրառում պարզ ժամանակների ժխտականը սովորա-
բար կազմվում է վէչ մասնիկով, սակայն ըղձական անցյալ ապառնի պարզ
ձևերը (պատմւմ վէչ լյալ, կյիրիմ վէչ լյալ) գործածական չեն. դրանց փո-
խարեն տարածված են պայմանական եղանակի անցյալ ապառնի դերբա-
յական կազմությամբ ձևերը. օրինակ՝ պատմիլ չըմ լյալ «չէի պատմի, չպատ-
մեի», կյիրիլ չըմ լյալ «չէի գրի, չգրեի» և այլն:

Ընդհանրապես արգելական հրամայականը կազմվում է անորոշ դերբա-
յով և մէ, մէֆյ մասնիկներով, սակայն ի, ա լծորդության բայերի եզակի ար-
գելականը կազմվում է նաև մէր (հոգնակին պահպանում է մէֆյ վերջավո-
րությունը) մասնիկով. այդ մասնիկից առաջ անորոշի լ-ն ընկնում է, իսկ
վերջավորության ի, ա ձայնավորները դառնում են ը, ինչպես՝ ասըմէր, հվա-
տըմէր, պատմըմէր, ասըմէք, հվատըմէք, պատմըմէք և այլն:

Շաղախի ենթաբարբառի առանձնահատկությունները ցույց տալու հա-
մար կարելի է բերել նորանոր հատկանիշներ, սակայն մենք ներկայացրել
ենք այնպիսիները, որոնցով Շաղախի խոսվածքախումբն առանձնանում է
ինչպես հին և ժամանակակից հայերեններից, այնպես էլ այլ բարբառներից:

ОСОБЕННОСТИ СКЛОНЕНИЯ И СПРЯЖЕНИЯ В ШАГАХСКОМ ДИАЛЕКТЕ

Б. Х. МЕЖУНЦ

Резюме

В шагахском диалекте имена существительные в неопределенной и определенной форме склоняются по-разному. Исходя из этого, для дан-
ного диалекта надо принять простое и смешанное склонения. По про-
стому склонению склоняются те существительные, которые в форме опре-

деленности и неопределенности в родительном падеже имеют одно и то же окончание, а по смешанному — существительные, имеющие в форме определенности и неопределенности разные окончания. Шагахский диалект имеет пять простых (*н, ш, шн, о, ց*) и четыре смешанных (*н-է, ш-է, շ-է, շն-է*) склонения.

В отличие от других армянских диалектов рассматриваемый диалект не имеет прошедшей формы вспомогательного глагола.

Значение прошедше-будущего времени условного и принудительного наклонений выражается неопределенным причастием и вспомогательным глаголом.